



Somaliland Non State Actors Forum

Location: Jigga-yar, Badda As, Behind WHO Office

Tel: +252-(0)-63-570536, +252-(0)-63-4414335

Website: www.sonsaf.org

Date: 31/08/2016

Warqaddii Lixaad ee Diiwaangelinta Codbixiyayaasha

Warbixinta Hordhaca ah, ee Diiwaangelinta Codbixiyayaasha Gobolka Sool iyo Degmada Buuhoodle

Koobid:

Diiwaangelinta codbixiyayaasha doorashooyinka la filayo inay Somaliland ka qabsoomaan Sannadka foodda inagu soo haya ee 2017 ayaa si nabad galyo ah uga bilaabantay Gobolka Sool iyo Degmada Buuhoodle 23 August, 2016. Diiwaangelinta Codbixiyayaashu waxay si guul ah hore uga soo qabsoontay Gobolada Togdheer, Awdal, Sahil, Maroodi Jeeh iyo Sanaag. Gobolka Soolna waxa uu noqonayaa gobolkii ugu dambeeyay ee dadka ku nooli isu diiwaangalinayaan sidii ay uga qayb qaadan lahaayeen doorashooyinka Madaxtooyada iyo Baarlamanka ee Somaliland.

Koox hawl wadeenno ka socdey Dallada SONSAF ayaa soo gaadhey hal usbuuc ka hor Bilowgii diiwaangelinta gobolka Sool, si ay tobarro u siiyaan shaqaalihii goobjoogayaasha maxaliga ahaa iyaga oo kaashanaya, madasha ururada bulshada rayidka ah ee arrimaha doorashooyinka (SCISEF), kuwaas oo Dallada SONSAF ay u kala dirtay 76 goobood oo ka mid ah 175 goobood oo diiwaangelintu ka qabsoontay Gobolka Sool iyo Degmada Buuhoodle, oo u dhiganta 43% si ay uga soo warbixiyaan qaabka iyo hanaanka diiwaangelintu uga socoto guud ahaan Gobolka Sool iyo Degmada Buuhoodle.

Iyadoo wajigii Koobaad ee diiwaangelintu soo gabagaboobay Arbacadii, 31, August, 2016, wararka hordhaca ah ee ay soo tabinayaan Goobjoogayaasha SONSAF ayaa

tibaaxaya in Guud ahaan diiwaangalintu si nabad galyo ah uga qabsoontay Gobolka Sool iyo Degmada Buuhoodle, illaa iyo imikana aan la soo sheegin wax amni darro ah oo dhacay.

Goob joogayashu waxa kale oo ay ku soo waramayaan in dadweynaha Gobolka Sool ay si balaadhan ugu soo baxeen diiwaangalinta iyada oo dhamaan goobihii diiwaangalinta loo qorsheeyay ee Gobolka Sool ay shaqadoodii si habsi ah u wataan. Arrintan ayaa loo aanaynayaa inay la xidhiidho shirarkii nabadaynta ahaa ee dadka deeganadaas iyo Dawladda Somaliland ku dhex maray deegaanada Awr boogays iyo Adhi cadeeye iyo waliba magacaaabistii wasiirka arrimaha guddaha Somaliland Mr. Yaasiin Xaaji Maxamuud "Faratoon", oo si weyn uga qeyb qaatey in dad badani ay taageeraan diiwaangalinta oo u arkey in kaalin weyn laga siiyey saamiga Somaliland ay ku leeyihiin dadweynaha gobolka Sool ku dhaqani, iyo in wasiirka laftigiisu uu olole weyn u galay sidii uu dadka ugu qancin lahaa iney qaataan kaadhka, isaga oo marey goobo badan oo gobolka ka mid ah. Arrintaasi waxa ay keentey in tiro badan oo dad ahi u soo baxaan diiwaangalinta sida ay xaqiijiyeen goobjoogayaashii maxaliga ahaa.

Goob joogayaasha SONSAF ee ku sugan Degmada Buuhoodle ayaa iyaguna sheegaya in Diiwaangalintu si nabad galyo ah uga socoto deeganaadaa inkasta oo Saddex goobood oo ka mid ah goobihii diiwaangalintu ahayd inay ka qabsoonto aanay illaa iyo iminka ka bilaabmin.

Warbixinta Guud

Diiwaangalinta codbixiyaaasha doorashooyinka soo socda ayaa si rasmi ah uga bilaabantay Gobolka Sool iyo Degmada Buuhoodle oo noqonaya Gobolkii ugu dambeeyay ee diiwaangalintu ka qabsoonto.

Xaflad si heer sare ah loo soo agaasimey oo ay ka soo qeybgaleen dhammaan danneeyayaasha arrimaha doorashooyinka Somaliland ayaa ka dhacdey xarunta hoolka hotelka Xamdi ee magaalada Laascaanood 21-kii August 2016-ka, oo ku yaal badhtamaha magaalada. Dhammaan danneeyayaashii ka soo qayb galay xafladdaasi waxa ay isku raaceen in taageero weyn la siiyo dhammaan dadweynaha ku dhaqan gobolka Sool iyo Buuhoodle sidii loogu wacyi galin lahaa iney is diiwaangaliyaan,

waliba si gaara xoogga loo saaro dhinaca amaanka oo ah lafdhabarta ay ku socon karto diwaangalintu.

Madaxweynaha Somaliland Mudane Ahmed Mohamed Mohamoud Silanyo ayaa booqasho daaran dhiirgalinta diiwaangalinta ku yimi Gobolka Sool todobaadkii ka horeeyay diiwaangalinta, isagoo dadka gobolka degan ugu baaqay inay is diiwaangaliyaan. Magacaabistii wasiirka arrimaha gudaha Mudane Yaasiin Xaaji Maxamuud "Faratoon", shirarkii isdaba yaalay ee Awrboogays iyo Adhi cadeeye iyo wadahalada u socda dawladda Somaliland iyo Khatumo ayaa loo aanaynayaa inay iyaguna laf dhabar u ahaayeen sida toolmoon ee dadka ku dhaqan Sool iyo Buuhoodle ugu soo baxeen diiwaangalinta.

Goob joogayaasha SONSAF ayaa soo tabinaya in wacyigalinta dadwaynaha Gobolka Sool ee diiwaangalinta ay qayb laxaadle ka qaateen Cuqaasha gobolka oo si gaar ah u wacyi galinayay dadka ku nool deeganadooda.

Goob joogayaasha Maxaliga ahi waxa kale oo ay ku soo waramayaan in maalintii koobaad ee diiwaangalinta goobo badan oo gobolka Sool ka mid ah diiwaangalintu dib u dhacday ka dib markii muran iyo is fahamwaa ku saabsan gaadiidkii agabka diiwaangalinta qaadayay uu dhex maray gaadiidleyda iyo shirkaddii guddida doorashooyinka wakiilka uga ahayd gaadiidka diiwaangalinta, arrintaasi oo dedaal badan ka dib la xaliyey.

Gobolka Sool iyo degmada Buuhoodle waxa dhammaan goobaha diwaangalintu ay ku shaqeynaayeen bilaa internet "offline", taasi oo sababi karta in qof laba meelood iska diwaangalin karo, arrintani waa mid u gaar ahayd gobolka Sool oo qudha, oo aaney la qabin gobolladii hore oo ku shaqeynaayey nidaam Online ah. Si kastaba ha noqotee arrintani waa mid keeni karta walaac ah in dad badan oo ku noq-noqdey ay waayi karaan hadhow kaadhkii ay xaqa u laahaayeen marka Server-ku kala shaandheeyo.

Lama soo sheegin ilaa hadda wax dhibaato ah oo ka dhacdey goobihi loogu talo galay diwaangalintu in ay ka dhacdo degmooyinka gobolka Sool marka laga reebo goobta numberkeedu yahay 1124 ee ka tirsan degmada Xudun oo habeenimadii 29ka August ay koox hubaysani soo weerartay goobta diiwaangalinta iyadoo askartii ilaalinaysay goobtuna difaacday inan qalabka diiwaangalintu u gacan galin dablayda hubaysnayd.

Dhanka kale waxa jirey goobo waqooyiga Hargeysa ah oo qorshuhu ahaa in diiwaangalinta dadka deeganadaas ku nool mar lala bilaabo Gobolka Sool, arrintaasi oo illaa hadda muran weyni ka dhex taagan yahay dadweynaha deggan goobahaasi oo qaarna diidan yihiin, kuwa kalena ogol yihiin in ay ka dhacdo diwaangalintu. Wasiirka arrimaha guddaha Jamhuuriyadda Somaliland Mr. Yaasiin Xaaji Maxamuud "Faratoon" ayaa wareegto uu asbuucan soo saarey ku sheegey in goobaha muranku ka taagan yahay ee waqooyiga Hargeysa ay ka dhaceyso diwaangalintu, balse dadku kaadhadhka ay qaataan ay ku gali karaan uun doorashada Madaxtooyada. Muranka goobahaas oo ah lix goobood oo ubucda khilaafka ka jiraa ku salaysanyahay mid xuduudeed oo u dhaxeeya Gobolka Awdal, Sahil iyo Maroodi Jeeh, ayaa imanaya xilli Wasaaradda Arrimaha gudaha Somaliland aanay wali samaynin xeer kala xadeeya Degmooyinka iyo Gobollada Somaliland.

Dalladda ururada Bulshada rayidka ah ee SONSAF waxay ku dhiirigalinaysaa dhamaan dhinacyada ay arrintani khusayso in si xilkasnimo ka muuqato loo xaliyo khilaafka deegaanadaas oo soo sannado badan soo jiidamayay isla markaana aan awood loo isticmaalin in lagu xaliyo

Geba-gebo

Wareegii Koobaad ee Diiwaangalinta Gobolka Sool iyo Degmada Buuhoodle ayaa si guul ah ku dhamaaday, iyadoo Gobolka Sool diiwaangalintu gaadhay dhamaan goobihii loo qorsheeyay inay diiwaangalintu ka qabsoontay ku firidhsan gobolka oo dhan. Degmada Buuhoodle waxa illaa iyo iminka aanay diiwaangalintu ka hirgalin saddex goobood oo qorshaysnaa oo ay ka mid tahay gudaha magaalada Buuhoodle. Diiwaangalinta Gobolka Sool iyo Degmada Buuhoodle ayaa la filayaa inay si rasmi ah u soo gabagabowdo 19 September, 2016.